

閑閑老人滄水文集

閑閑老人溢水文集卷第五

古詩

題趙琳畫東坡石上以杖橫膝肩頭

廟堂竟何人此老乃石上盤礴萬古胸入此一籐  
杖擊去荆舒蠻扶來司馬相君看熊虎顏百獸不  
敢傍

又

東坡謫嶺南一笑六根淨食骨不棄餘又使群狗  
競手中果何物乃是照邪鏡爾曹何足容以杖叩

其脛

擬陶和許至忠 二首

西日頽殘照北風凜寒威侏儒飽欲死幽人獨無  
衣不上北闕書甘采西山薇曾子已再化甯遠早  
知非豈不樂仕官恐與心事違柴桑舊三徑吾行  
其庶几尚於淵明翁頗負責子譏隱几茅簷下聊  
欲曝斜暉

又

歸田有何樂佳處正在茲閑同老農語夜雨深一

犁行年近六十悠悠復何之有田足我食有布成  
我衣富於黔婁生樂於榮啟期妻子愠見言一點  
不上眉吾師有遺訓貧賤不能移

題牧牛扇頭

一牛顧其犢一牛軒尻睢旁有牧犢子窺巢攀樹  
枝嗟爾有餉具不念鴉雖飢烏鴉各天性飛來護  
其兒汝親亦念汝而人獨不知不如兩相忘人禽  
相娛嬉

東籬采菊圖



淵明初亦仕迹留心已遠雅志懷林淵高情邈雲  
漢妖狐同晝昏獨鶴警夜半平生忠義心回作松  
菊伴東籬把一枝意豈在酒醞不見白衣來目送  
南山雁淡然忘言說聊付一咲粲

贈眼醫

和扁不並世世豈無良醫今代王彥若恨無東坡  
詩大弨卧壯士積熱下腦脂神針運斤風此妙人  
得知君言吾有道神視了不疑摩山導河流破壁  
取蛟螭聖道如日月浮雲時翳之誰為補天手刮

膜施金篋韓孟不可作此藝真吾師

釣蓬

船蓬無可載意釣不在魚此身真襍禡萬事一蘧  
蓑無載不載沉死魚安足餌洛水是非波臨軒聊  
洗耳

聽雨軒

無田妻啼飢有田稻蟠泥等為飢所驅貧富亦兩  
齊雨中窓下眠窓外芭蕉語置書且安眠催租吏  
如雨

擬東坡謫居三適

旦起曠日

老人畏朝寒常恨為物役把搔未云已簡書催我  
出爾來先朝恭晨起喜見日王事有期程安能待  
于息披衣向東方聊復效龜吸漸漸支體柔谷谷  
真氣入少焉肝腸暖陽和通百脉吾年六秩餘前  
路那可必未來不吾預已逝安容息及此未病間  
聊冀一溉溢

午窓曝背

清晨了公事及午身得閑南榮有晴日曝背於其  
間稍稍陽光舒融融和氣還時携一冊書眼花紛  
爛斑倦即枕書卧散盡腰脚頑清於三杯餘甜勝  
一味嗔人間有此適不憂天公慳世人慕暖熱肉  
屏醉雲鬢雖得一餉樂憂喜常相関痴兒亦咲我  
市中有樵山

夜卧炕暖

京師苦寒歲桂玉不易求斗粟換束薪掉臂不肯  
酬日糶五升米未有旦夕憂近山富黑鑿百金不

難謀地坑規玲瓏火穴通深幽長舒兩脚睡暖律  
初迴鄰門前三尺雪鼻息方齁齁田家燒楮拙濕  
烟泣泪流渾家身上衣炙背曉未休誰能獻此術  
助汝當衾裯

做聖俞月出斷岫口

二首

末伏暑尚在雨點落未落夢覺起視夜缺月掛屋  
角

又

殘星橫斜河晨鷄號天風幽人窓中眠紗厨明秋



空

長白山行

長白山雄天北極白衣仙人常出沒玉龍垂爪落  
蒼崖四江飛下天紳白匹馬渡江龍飛天雲起  
王化千百至今甲第多屬籍時清毬馬爭馳突錦  
韉貂帽蠟春風五陵豪氣何飄忽前年胡騎瞰中  
原准擬長城如削鉄君家兄弟真連壁胸中十萬  
森戈戟向淪論事天子前漢庭諸公動顏色心知  
不易一囚命顧肯貪功事無益西南方面應時須

帝曰來前無汝易從來十益不補損三輔蕭條半  
荆棘瘦妻曳杷女扶犁惟恐官軍缺糧給嗚呼瘡  
痍尚未復且願休兵養民力老夫謬忝春官伯白  
首書生不經國佇公功成歸廟堂再獻中興二三  
策

渡水僧 二首

落日前溪渡鐘聲隔岸聞秋水深可涉挽衣踏行  
雲行雲忽破碎波動生魚鱗化為百千我何者為  
我身此身尚非我况復影中人畫師畫具眼了此

起滅因三生祠山夢一笑語前塵

其二

一僧杭中流杖笠行相隨波紋生足指照影光瀾  
瀾一僧到彼岸前引如導師腰間兩不借身外一  
伽黎一僧方欲涉結帶如有思前山鳥飛夕後山  
雲起時君看眉頰間中有摩詰詩

時雨

時雨美胥莘公也公以行臺移鎮平陽鄰  
畏其威民懷其德焉

天降時雨山川出雲天相休運是生世臣維我世  
臣乃國於莘天子命之牧爾邦民北風喈喈雨雪  
霏霏嗟我晉人而瘡而瘼吹之响之摩之拊之于  
燠其寒于飽其饑既瘳既夷不嘖以嘻孰為豺虎  
載柵載壘孰為蝨賊載芟載理無擾我鄉我鄉我  
里無伐我桑我桑我梓遠夷駟矣我民休矣公在  
在堂如春斯溫激矢在壺折衝于樽民安于廛兵  
安於屯公在在堂錦衣繡裳敝予改為斯民不忘  
公在在堂繡裳錦衣我民之思無以公歸

皇武

皇武命平章公移鎮陝右也

皇奮厥武如雷如霆獷彼遠夷載震載驚帝命相  
臣蘇我疲民維時莘公展也大成公自平陽移鎮  
於秦世皆謂公在震陽春公在在秦有年無兵世  
皆謂公斯民德星維此二方不寧不令帥臣議征  
發言盈庭公奏累上如山不傾世皆謂公漢之營  
平既完三輔復保五城以迄於今夏人請盟維將  
盡能維公竭誠公拜稽首天子之明我公歸矣我



澠水五  
民思矣詔公復起周邦咸喜願公百年以佐天子  
罔俾樊侯于周專美

鄭子產廟

晉楚更霸爭雄尊勢如兩帟挾一豚玉帛事楚方  
南轅晉師已及國北門鄭有人焉國無小晉楚雖  
大談笑了臨風三嘆酌酒樽注目蒼陂望高鳥

過湖城

暮行潼關道百里蒼山昏勢斷忽平野大河東南  
奔我行屬冬季風雪浩以繁玄雲結層陰狐貉不

得温豈不念白首出使萬里番惜彼守凍者據鞍  
復何言

過閔鄉

秦關百二天下壯百萬雄師未能傍函關未了又  
潼關潼關之敗何等閑九齡斥逐姚宋死邊將邀  
功從此始今年西屠石堡城明年又起漁陽兵朝  
廷欲藉邊將重不覺胡雖心暗動祿山前死未可  
知雖有漁陽突騎將奚為自古明王重用武莫咲  
書生陳腐語

含元殿

泰山從此來宮殿何巍巍含元遺址在下建十丈  
旂當昔休明日軒陛朝諸夷一旦人事改翻坐牧  
羊兒譬如元氣衰百疾攻四肢陵夷更五代興亡  
如奕碁塵埋梨園骨火燒花萼碑寢殿通樵徑宮  
墻插酒旗至今明月夜石馬空聞嘶蒼天不可問  
渭水空自馳誰為後來者應與此心期

過乾陵

乾陵故梁山也舊有柏萬株亡矣有石蕃

王像來朝者六十四至今猶存下有章懷

太子墓

曉日上乾陵乾陵何巍巍前瞻對雙闕上有十丈  
碑左右蕃夷像想見朝貢時一坏土未乾衮服易  
禕衣好還雖天道剪伐盡本枝淒涼廬陵謫慷慨  
黃臺辭賴有狄相國取日洗咸池母后盜國鼎呂  
氏非薄姬中睿乃其子天幸亦其宜驟山三日火  
見咲牧羊兒如何陵上柏獨有神護持千秋百歲  
後魂魄復來茲故山草木頽應悔復辟遲天回西

日照歲暮北風吹南登樂遊園默誦昭陵詩

發棗社

夜發棗社駟寨帷見明月月照斷崖冰風吹陰磴  
雪山重復峻嶺十步九盤折兩崖夾深澗線路僅  
容輶縋車下百尺懸懸聲未絕坡陀倒平地稍喜  
見雉堞隔城聞鐘鼓星斗何歷歷故人相勞苦杯  
酒慰行役夜闌秉明燭相對恍如失

過寧州

季冬落日黃霜雪原野白驅車上峻坂十步百夫



力我行未半嶺回視但木末白雲在高頂可望不  
可及北風吹去翼孤烟帶遠客居人候征騎僕僕  
望前駟蒼皇下陂陀張燈已昏黑

遊華山

我從秦川來歷遍終南遊暮行華陰道清快明雙  
眸東風一夜橫作惡塵埃咫尺迷岩幽山神戲人  
亦薄相一杯未盡陰霾收但見兩崖匝壁插劍戟  
流泉夾道鳴琳瑯希夷石室綠蘿合金仙鶴駕空  
悠悠石門忽斷一峰出婆婆石上為遲留上方可

望不可到崖傾路絕令人愁十盤九折羊角上青  
柯平上得少休三峯壁立五千仞其下無址傍無  
儔巨靈仙掌在霄漢銀河飛下青雲頭或云竒勝  
在高頂脚力未易供冥搜蒼龍嶺瘦莓苔滑嵌空  
石磴誰雕鏤每憐風自四山而下不見底惟聞松  
聲萬壑寒飈颺捫參厯井到絕頂下視塵世區中  
囚酒酣蒼茫瞰無際塊視五岳芥九州南望漢中  
山碧玉簪亂抽况復秦宮與漢闕飄然聚散風中  
漚上有明星玉女六洞天二十八宿環且周又有

千歲之玉蓮開花十丈藕如舟五鬣不休之長松  
流膏入地盤蛟虬采根食實可羽化方瞳綠髮三  
千秋時聞笙簫明月夜芝輶羽蓋來瀛洲乾坤不  
老青山色日月萬古無停翰君且為我挽回六龍  
轡我亦為君倒却黃河流終期汗漫遊八表乘風  
更覓元丹丘

做淵明自廣

天地有常度日月有常數有生則有死如朝必有  
暮來者不可却去者那容駐但喜故歲新新年行

復故故交零落盡世豈能久住年衰性自忘所以  
語多悞况復眼半昏文字宜少戲前路那可知正  
宜委運去幸近古稀年無復更多慮

和淵明飲酒 二十首

翩翩萬里鶴日暮將何之昏鴉擇所安笑汝不知  
時孔席不暇煖此理吾不疑尚愧淵明翁濁酒時  
一持

其二

少長慕富貴老大思丘山一為妻子累不肯踐斯

言誤落塵網中，  
黽勉四十年。吾衰有兒子，  
門戶幸可傳。

其三

漆園去我久，  
舉世少真情。晉宋多名流，  
惜哉亦虛名。浮虛忘軒冕，  
踰檢稱達生。淵明初亦仕，  
不為寵辱驚。笑彼夸毗子，  
空誤竟何成。

其四

貧賤豈不苦，  
仰慕冥鴻飛。富貴豈不樂，  
乃有黃犬悲。苦樂各異趣，  
嗜好從所依。我欲作九原，  
獨與淵



明歸掛冠不待年况此齒髮衰遙酌一盃酒毋令  
寸心違

其五

琳宮雜鼉鼉頗獸鼓吹喧既久少人事却愛幽居  
偏南軒有竒趣雲峰可當山一雨溪水漲稍稍魚  
鳥還我亦樂其樂可為靜者言

其六

好醜無定在當時者為是彌子當寵時安知後來  
毀立道每如斯吾生幸不爾舉世尚五弦安事矜

綠綺

其七

少年喜草書臨池學伯英縱橫挾造化如見萬物  
情墨濡四溟窄筆落三山傾年來頗自咲惜哉以  
技鳴白首竟無得俯仰愧此生

其八

秋菊有至性霜松無俗姿采采黃金花咲撫蒼烟  
枝偶有杯中物成此一段奇白雲南山來出岫復  
何為醉卧東籬下聊脫人間羈

其九

今日好天色清晨雲雪開東風如故人適我平生  
懷忽見南來燕孤雌與雄乖暮歸主人堂梁間有  
雙栖巢傾覆其子又補新巢泥翩翩隨陽雁幽真  
苦難諧江湖偶相失咫尺雲路迷哀哀霜雪際獨  
向胡天迴

其十

鷺鳥閉籠中舉翮觸四隅騏驎駕鹽車跼感困中  
途一朝遭識拔未免為人驅傍觀信美矣自愧良

有餘不如兩無累還我田園居

其十一

千載淵明翁誰謂不知道閑賦責子詩調戲乃娛  
老杜陵蓋自况亦豈恨枯槁壺觴清濁共適意無  
醜好歸來五柳宅守我不貪寶長嘯天地間獨立  
萬物表

其十二

憶昔告歸老方屬者指時眼昏頭半白誓將從此  
辭幾年不得謝因循到今茲耳聾左目盲決去吾

何疑君恩雖云重竊祿良自欺乘流且復逝遇坎  
將安之

其十三

昔我謝事時曾造老衲境謂言方閑去如醉不得  
醒至要無多言退步心自領一朝桶底脫露出囊  
中穎有如暗室中照耀穎燭炳

其十四

巖風大澤枯霰雪寒威至此時陶彭澤相與父老  
醉醉不必相扶顛倒無倫次處世貴無名不知斯

我貴斯人今已矣三嘆有遺味

其十五

憶我滄水陽經營五畝宅脩竹幾十竿今為狐兔  
迹相逢問鄉舊里巷不盈百艱難驚獨在鬢髮颯  
已白一醉齊彭殤無為空太息

其十六

幽居淡無事雅志了玄經眼花憎文字悠悠竟無  
成中夜起不寐披衣守寒更梅竹散清影素月流  
廣庭孤鶴闕逸响切切寒虫鳴撫卷長嘆息慷慨

惻中情

其十七

淵明雖不仕愛此北窓風  
曲肱枕書卧樂亦在其  
中時持一杯酒賴此齊窮通  
大咲杯中蛇晚矣悟  
彫弓

其十八

漢儒傳注學未為無所得  
秦火少完書豈免烏馬  
惑後儒補罅漏聖道稍閉塞  
俗士喜持戈又一秦  
相國且共歡一觴多言不如默



其十九

昔我平生友峨冠及偕仕居官不避事力學固為  
已非無濟時策壑斲亦云恥行年未六十賫志沒  
蒿里蹇予隨朝班星霜幾四紀譬如遠行客日暮  
尋所止養志歸田廬晚節猶可恃

其二十

淵明非嗜酒愛此醉中真謂言忘憂物中有太古  
淳回首市朝中萬事牛毛新去年持使節悠悠過  
西秦宮闕隨飛烟衣冠化埃塵當時憑軾士慷慨

嗟徒勤所以山林客樂與魚鳥親西登太華頂曠  
望長河津寄謝三峯雲聊欲濫吾巾誓將從此去  
咲謝當途人

擬和韋蘇州

和西澗

雨荒竹迳草叢生樹隔前溪一犢鳴步尋幽澗疑  
無路忽有人家略竹橫

和烟際鐘

近壑歛暝色遠山猶夕暉聲從烟際起復向烟中

微隨風散林野渡頭人未歸

和西塞山龍門

雙闕聳岧峣神斧忽中斲一水從中來千龕道傍  
湍

和山耕叟

步逐麋鹿迹詎知朝市情負薪南澗曲荆棘雨中  
行呼兒問牛飽又向山田畊

和上方僧

石潤雲生衲崖傾月照禪曠衣橫竹錫洗鉢落岩

泉但見山花發幽居不記年

擬詠夜

明從暗中去暗從明中來流光不待曉闇盡玉爐  
灰

擬詠聲

萬籟靜中起猶是生滅因隱几以眼聽非根亦非  
塵

和寄全柵道士

潘清容自鄠移樓觀與中條喬象之同居

新移白閣峰遠訪中條客結茅授經臺共坐雲間  
石松龕讀易朝月窓談道夕從此別終身區中了  
無迹

和遊溪

清溪霧氣散水涵天影空白雲翻着底移舟明鏡  
中鳥近前灘白花移別岬紅遙知夜來兩山色翠  
如葱

和秋齋獨宿

冷暈侵殘燭雨聲在深竹鷺鳥時一鳴寒枝不成

宿

和聽嘉陵江水教代深師答

驚湍瀉石崖百步無人跡  
愛此喧中靜聊布安禪  
席水無激石意云何轉  
雷聲仁者自生聽達士了  
不驚心空境自寂淡然兩無情

和演師西齋

不見竹間僧但聞花外磬  
敲檻出魚遊巢簷知鳥  
性雲蒸坐禪石露濕行道  
逕夜寤一燈殘山月來  
破暝

和遊開元精舍

松軒風掃靜  
終日閉門居  
犬卧青苔地  
鳥啣紅柿  
初瓶殘夜禪  
起經潤雨翻  
餘自是少人迹  
非閑往來疎

和荅中山道士

行轉青溪又別峰  
馬蹄終日認樵蹤  
翠微深處無人住  
寺在深山何處鐘

和西樓

十去龍沙雁  
年年久不歸  
烟塵猶未息  
莫近塞雲



飛

和瑯琊萬壽寺

茲寺廢已久，經構昔未遑。一朝煥金碧，煌煌耀東  
崗。文母開大施，天厨來衆香。榮回轉佛閣，窈窕閟  
禪房。平地俯歸鳥，高齋在上方。宿雲不歸山，野水  
自成塘。道人如水鏡，見者心清凉。理勝是非遣，慮  
淡形蹟忘。歸鞍惜清境，佇立暮天蒼。

擬漠漠來帆重冥冥去鳥遲

薄暮瀟瀟雨，何人獨倚欄。濛濛山氣重，淡淡水紋

寒草際光獨泫松梢滴未乾  
燈前未歸客無夢到  
長安

擬何時風雨夜復此對床眠

幽居少人事有客來不速  
爐內火正紅尊中酒新  
綠高齋始聞雁隔窓時動竹  
何當風雪夜抱被還  
同宿

擬綠陰生晝寂孤花表春餘

了無車馬迹終日掩禪關  
不下溪頭路坐看簷際  
山好鳥破午寂幽花淡春閒  
簪組方為累來遊不

知還

擬兵衛森畫戟燕寢凝清香

冠帶事朝謁清坐彈鳴琴以彼塵外趣遠我遺世  
心岸幘送歸鳥隱几見遙岑聊同靜者樂豈必居  
山林

送麻徵君知幾

丹山五色鳳一舉眇天隅文采瑞聖世不為竹與  
梧渥洼汗血種逸氣凌九區可見不可攀白壁誰  
敢沽夫君號神童七歲能草書二十上詞賦下筆

凌紫虛三十富經學兩魁天下儒娥眉衆女嫉反  
畏知名譽一朝相捨去願以道自娛閑觀養性書  
洞究先天圖姓字聞天朝相公借吹噓左丞薦從  
容拜恩命移疾還里間諸公惜其去乞留侍玉除  
掉頭不肯住一飯吾豈無君看澤中雉飲啄良自  
如一旦畜樊中意氣恹不舒又如田間牛騰擲適  
有餘被之以文繡顧影反踟躕君恩豈不重力疾  
湏人扶旁觀信美矣違已非病歟不如本無累還  
我田園居喜君節獨高知君功名疎可以激頽俗

可以勵貪夫異時高士傳名與西山俱

飲馬長城窟行

飲馬長城窟泉腥馬不食長城城下多亂泉多年  
冷浸征人骨單于吹落關山月茫茫原上沙如雪  
十去征夫九不回一望沙場心斷絕胡人以殺戮  
為耕作黃河不盡生人血木波部落半蕭條羗婦  
翻為胡地妾聖王震怒下天兵天弧夜射旄頭滅  
九州復禹跡萬里還耕桑但願猛士守四方更築  
長城萬里長

猛虎行

猛虎在深山一怒風林披朝食千牛羊暮食千熊  
羸虎暴尚可制人還寢其皮旄頭飛精光落地為  
積屍焚山赭草木血征成污池萬靈泣上訴生民  
將何為帝怒勅六丁雷雷下取之埋魂九泉底壓  
以泰山坻然後天下人頗得伸其眉寄言顛越者  
毋得育種遺

傲老杜無家

弟妹他鄉隔無家問死生兵戈塵共暗江漢月偏

清落日黃牛峽秋風白帝城中原消息斷何處是  
秦京

做劉長卿出塞 二首

上山搖白旗下馬駐旌麾虜騎數重合漢人三日  
圍天寒短兵接日暮戰聲微萬里天山北招魂葬  
不歸

又

初從召募軍麾下點行頻衣上兩行泪燈前萬里  
身鼓聲青海振戰骨黑山塵落日邊風起蕭蕭愁



殺人

楊妃墓

灼灼陌上花青青路傍草人心任榮悴過眼無醜  
好馬嵬三尺墳西出劍門道如何傾國顏傷心不  
同老

李夫人

夫人臨訣時掩面羞人主空餘返魂香默默不得  
語千秋百歲浚粉黛化為土一笑不成妍春風花  
自舞

延安滋戒師余初主安塞堡簿時相識也今

戊子歲春被命作醮平涼偶得相會以四

十三年之舊故集句以贈之

五城何迢迢杜關河茫茫隔波浪許表民與君別

來今幾時盧仝翰林白髮三千丈王琪形容變盡

語音存東坡閑思往事是前身樂天四十三年如

電抹東坡欲談前事恐無人子由龐眉皓首無住

著杜臂上念珠如皎日唐僧架上楞嚴已不看東

坡更看脚根叅一節山谷人生何處不相逢丁寇

猶恐相逢是夢中  
晏殊原  
全是行人更分首  
山谷  
明朝車馬各西東  
歐陽

閑閑老人滄水文集卷第五



閑閑老人滄水文集卷第六



律詩

塞上

四首

窮邊四十里野戶兩三家山腹過雲影波光戰日  
華汲泉尋澗曲樵路入雲斜隨分坡田罷還簪野  
草花

其二

因尋射鵬壘偶到殺狐川鹵地牛羊瘦邊沙草木  
羶廢城餘井臼古戍斷烽烟自說無征戰經今六

十年

其三

薄官邊城裡經年無客過一川平地少四面亂山  
多野色連秋塞邊聲入暮河舊貂寒更薄飄寄欲  
如何

其四

樹靄連山郭林烟接塞垣斷崖懸屋勢漲水沒沙  
痕烽火雲間戍牛羊嶺外村太平閑檄手文字付  
清罇

寒夜

歲晏寒無那  
夜深清欲飢  
竹風驚夢斷  
雪意聽窓知  
稍稍鵲翻樹  
蕭蕭人語籬  
虛明滿吾室  
何許月來時

三山渡口

春水三山渡  
斜陽八字堤  
河淤樹身短  
沙截草痕齊  
地納黃流大  
天啣浚澤低  
故人不見我  
愁思使人迷

西陵



霽霽西陵樹蕭條歌吹聲客愁連斷雁地古更荒  
城山色嬌新雨河流怒不平浮雲臺上起不盡古  
今情

栢人光武廟

真人開有漢帝業肇蕪菱洒落君臣契艱危廟社  
圖山川扶鄣邑日月拱東都社稷千秋里風雲四  
達衢北風吹雨雪西日照桑榆舊物餘翁仲荒祠  
老祝巫功臣遺像在時有鼠啣鬚

正覺院

西日轉廊腰，踈鐘送寂寥。  
壞牆緣苦竹，歌屋上凌  
霄。白髮知僧臘，青燈更客宵。  
葉聲風外盡，窓雨續  
蕭蕭。

開元寺

歲久開元寺，槐花落石龍。  
僧瓶深碧甃，蝸壁篆金  
容。窓影年年塔，禽棲夜夜鐘。  
平生睡秋雨，竹閣味  
偏濃。

散策

解鞍成小憇，散策遂幽欣。  
偶拂水邊石，坐看崑上

雲桑麻深畏景水竹淡斜曛興寄方自得清涼誰  
與分

陸渾

言從陸渾去不遇蕪芝還鳥飛不盡處夕陽千萬  
山雲起動兼靜水流忙更閑坐待石上月滅沒烟  
嵐間

梁園中秋

今夜梁園月相逢照一樽他時千里共此會幾人  
存老我追隨盡恰渠咲語温不眠瞻玉兔終夕露

荷翻

梅和尚節使挽詞 二首

鏖戰群奔外申威一呼間功名歸死事義勇鄙生  
還矢向胡天盡弓猶漢月彎君王思戰苦起塚像  
天山

又

走卒知虜將兒童說義州甘心輕白羽苦戰脫兜  
牟援絕揮戈地創餘振臂秋英魂知不泯結草抗  
邦仇

温妃挽詞 二首

白日森容衛青春忽夜臺鼎湖龍已去  
謀館燕空迴仙駕隨天遠粧奩惻聖哀  
祇應彤史上遺不塵埃

又

容衛三春肅如何一旦殊妃星淪紫極  
帝子沒蒼梧卜地陪長樂升天後鼎湖  
皇情何以慰彤管載嬪虞

和西溪思歸

好在西溪隱人今白玉堂興來看畫本夢去拂西  
墻舊竹多年合新松幾許長從渠黃石老獨占白  
雲鄉

獄中

處順初無累安時故不憂敢違身後慮甘向死前  
休有姊如工部無兒似鄧攸悠悠天地意還許望  
松楸

徙倚

徙倚秋原上長吟動所思草荒天馬瘦日落野鷹

饑多病親用改中年齒髮衰功名付公等才力况  
明時

寒食遙奠西山寺

二首

榆中草色蕪春水稍漸車野祭一盂飯鄉愁千里  
餘年年寒食客日日故園踈莫訝交親絕稽康懶  
寄書

又

季來百事廢漸與世情踈案上一杯酒床頭幾冊  
書春風疑混沌水月似空虛頃刻翻晴晦吾心淡



久如

赴寧化宿王道

山屋如鷄柵才容卸馬鞍  
風吹四山雪月照一川  
寒不敢侵星起惟愁上嶺  
難中宵問前路客枕若  
為安

觀音院

棟宇懸崖上風烟勝槩中  
寒通汾渚月清帶雪山  
風若水垂瓶得棊燈鑿牖  
通仍聞馬頭寺別業亂  
山叢

北垞

驅馬北垞上山光淡復深夕嵐無遠近返照有晴  
陰泉落莓苔石風光松櫟林悠然成獨酌啼鳥是  
知音

蘆芽山

荷葉平初盡蘆芽勢漸分朝來知宿雨谷底見歸  
雲日上松猶滴風來草自薰臨溪歸路險萬篔下  
河汾

荷葉平

平生慣山水見之如等閑  
竭來驚老眼何處無名山  
齒萃千峯外蒼茫一雨間  
山神應解事為我洗  
孱顏

管州道中

龜手酸風裏寒多酒不勝  
馬蹄荒店雪人迹斷橋  
冰瘦骨成山字霜髯作戟  
稜綠牕三丈月政爾夢  
騰騰

代郡張氏瑞栢堂

鬱鬱何年植盥盥兀老蒼  
文章深籀篆忠義抱風

霜子舍占烏鵲孫枝託鳳皇主人廊廟具會見拂  
雲長

謁北嶽

四大神儀一群山大茂尊奠方荒奠宅視禮配天  
孫西送虞淵暮東瞻碣石瞰寶符臨代郡巨鎮扼  
并門控趙襟形壯包燕氣象渾九河探禹跡萬里  
叫虞魂在昔登封始前驅羽衛繁千官駢部曲萬  
騎隘山樊卜地恒陽曲移祠泰始元晉移祠曲陽  
荒碑刻歲月飛石碣乾坤帝秩加黃屋宮居象爨

垣雲楣朽芝瑞而砌裂槐根天業恢弘大山靈翊  
衛屯巫閭歸帝制長白發金源九廟龍盤接三邦  
地勢吞雲烟浮近甸日月繞中原歎謁天香重封  
題御署存銀鏤諸產富雷雨萬靈奔神聽羞回德  
天聰納正言負時身九死去國泪雙痕日近趨天  
闕生還託聖恩許身徒稷契無術補羲軒帝錄長  
桑洞仙岩張果村卜居如可近重整此山轅

過黃崖

二首

患難驚身在龍鍾感歲新山川愁倦鳥歲月老行

人落日黃崖古東風白雪春傷心潢水北無乃久  
風塵

又

落日逢人恐深秋動旅懷乳鷹家碧嶂飢虎吼黃  
崖此道將何適吾生尚未諧傷心墟落裏犬舐有  
殘骸

桃花島回寄王伯宜

水破村橋擁春寒旅雁低遠山封霧小高浪與雲  
齊島寺明松雪潮船濺藕泥詩情吟不盡寄語畫

中題

咸平道中

道壞緣岡遠村流自作塘夕陽開野色秋水納山  
光雨住林逾黑鳥天更蒼冥搜無好句淡墨寫  
微茫

慶雲道中

對岸青山隔孤城碧浪開綠蕪天際合白鳥日邊  
回渡口呼舟急沙頭立馬催夕烟生極浦欲上客  
衣來



中秋金河感懷

金河今夜月遼水一尊同雁影不復北馬蹄猶向  
東山川新戰血宇宙舊飄蓬擾擾余生事愁來醉  
眼中

登巢雲樓

烽火三年戍沙沱幾戰場自予甘薄宦與子各殊  
方寒木銷春色高樓傾夕陽如聞洗兵馬失喜問  
臨潢

和陽子元

二首

紅葉如人老黃花與世疎  
物華行晚晚天宇迥澄  
虛山作幘風畫雁成人  
字書相逢一杯酒秋興各  
何如

又

小雨班班落庭槐  
檝檝踈秋涵山骨冷  
天入水痕虛多病難忘  
酒窮愁強著書深慚靈  
感老時復問何如

松下獨酌

行人隱微運古寺帶平崗  
山勢依城斷河流入野

長樹欹枝壞道草卧壓頽墻獨酌無人共松風薦  
一觴

松山道中

松漠三百里飄然一日中山長雲不斷地迫雪無  
窮遠嶺貪殘照深林貯晚風烟村一回首獨鶴下  
晴空

疊翠崑

三首

枯枿似黔突斷崖如削瓜林深自風雨地古更煙  
霞脚力行將盡雲山殊未涯試窮千里目直北際

龍沙

其二

飛身清曠外。着眼有無間。  
崕斷疑無地。雲開更有山。  
鳥隨天影沒。人自日邊還。  
歸夢扶清境。詩情不得閑。

其三

帳殿臨青嶂。蒼崖襲翠烟。  
孤根盤厚地。秀色入蒼天。  
井有四時雪。岩垂萬古泉。  
皇情非暇豫。問路到山川。

陪李舜咨登憫忠寺閣

日月纏雙拱風烟納寸眸  
雲山浮近甸宇宙有高樓  
鳥外餘殘照天邊更去舟  
登臨有如此况接李膺遊

宿崔家庄

野次寒山外人家霽雨中  
飢鷹蹲落照危葉顫西風  
墻缺青山補槁歌白水通  
豐年聞好語倚杖問衰翁

過滹水

夕陽山豁霽平照大河流漠漠雲間樹悠悠天際  
舟黃塵隨匹馬白水自雙鷗會得閑中趣浮生半  
白頭

通許道中

南征

曉逐三軍發清寒苦不禁征驂過野店寒月出疎  
林宿火留行客霜枝滑凍禽據鞍覓閑句愁些不  
成吟

廬州城下

月暈曉圍城風高夜斫營角聲寒水動弓勢斷鴻

驚利鏃穿吳甲長戈斷楚纓迴看 戰雲慘淡暮

寒生

章宗挽詞

鳳紀三千歲龍飛二十年竟辭徽號冊空頌柏梁  
篇授聖金滕起遺言玉几宣建平何苦識兩泣戴  
仁天

暮春

自嗟中歲在不與暮春宜非復歡娛地其如老大  
時百年歸覽鏡萬事入支頤此意無人會陶情一



賦詩

汝甕酒尊

祕色創尊形中泓貯醪醴縮肩潜蝨涎蟠腹漲青  
寧巧琢晴嵐古圓瑳碧玉瑩銀杯猶羽化風雨慎  
緘肩

湧雲樓雨

滿地江湖夢連陰晦朔秋雨中山似醉風外浪如  
愁眼病憎黃卷心安任白頭明年一官滿誰復話  
登樓

窮愁 二首

乍喜三庚伏還驚一葉涼窮愁天色少睡思雨聲  
長掩卷悲興替懷人問在亡平生庾開府詩興未  
能忘

又

何處新秋好飄蕭意欲仙乍涼新雨後欲曙未明  
前莎影蛩吟地松梢鶴唳天物情無好醜適意各  
天然

和潘師韻

睽離三十里重此叩玄微日月雙蓬鬢乾坤一布  
衣月明過水宿秋老華峰歸不得陪仙馭浮生有  
是非

和政老九日韻

數日閑齋卧體中殊不佳那知是重九但喜見黃  
花矯首懷天末携壺傍水涯琳宮題壁處醉墨字  
歌斜

贈茅先生

二室神仙宅三茅道士家野人遺竹箒劉仙編竹

幕以給公朝夕弟子掃松花有道能擒虎無心任  
踐蛇天平有陳迹吾欲老烟霞去歲兵至公菴公  
了無懼色兵亦不敢害

大雪 二首

大雪無朝暮衰年見未曾園林春浩蕩川岳氣憑  
陵雲慘天應漏陽微并欲冰欲尋安道舍何處一  
龕燈

又

大雪欲平蒼黃昏氣轉嚴天邊迷草樹雲外失烏

蟾天意平高下人情有愛嫌飽餐酬桂玉樓上醉  
厭厭

雪霽

黃雲霽雪威寒日淡暉暉雨砌晴先滴風簷落更  
飛侵凌池面瘦推腫樹身肥長憶廬陵老憂時詠  
鐵衣

十月菊得深字

地偏開較晚風勁可能禁雨漬金英淺寒添紫暈  
深抱叢無晚蝶窺蕊有貞禽留待飄零後梅花約

重尋

白雁

波淨影逾白，霜清鳴更哀。  
乾坤雙鬢老，風雪一聲來。  
林迥隱猶見，天長去復迴。  
物情嫌太潔，莫使羽毛摧。

雪

朔雲連鄭圃，飛雪滿梁園。  
猛勢池心滅，清聲竹外繁。  
飢鴉寒啄樹，敗屣踵臨門。  
何以娛佳客，開軒對一尊。

野菊

離離崑下菊無主  
混蓬茅路斷秋光  
隔山明水影  
交荒叢鳴蟋蟀  
寒葉掛蠨蛸  
擬訪陶廬飲柴扉  
何處敲

岳觀

步屨方壇上行吟  
避草芽簾散風拂  
燕池影柳蹲  
鴉天入濛濛  
雨春歸淡淡  
花遊春心未老  
墻外渡  
香車

秋雨



天邊認遙電雲際尚殘陽雨脚夜深白濤頭晚霽  
黃沙邊明雁影林下見山光擬盡登高興秋懷祇  
自傷

手搯樺皮彈琴圖

何人聊幻巧袖裏出毫端道眼無二見心齊廢六  
官煩君無耳聽寓我非指彈攬却伯牙手秋風萬  
籟寒

早出新安

夜宿新安駟平明雪塞碛馬頭迷舊路虎跡印新

蹄冰凍寒流狹天啣遠路低人稀山店遠茅屋只  
聞鷄

明惠皇后挽歌詞

四十首

皇明齊月象厚德配坤元惻怛憂民意勤勞毓聖  
恩國風悲卷耳星緯暗軒轅喪妣人心痛哀號望  
寢園

其二

威儀文物備祖載出叢塗薄葬追三代嚴禋致九  
虞仁恩遺鳳詔功德載龜趺左右重興業詩書讚

永圖

其三

太極齊元始三光並照臨  
勤勞憂國念惻怛愛民  
心玄鳥歌殷母思齊詠  
太任兩朝難儷美萬古播  
徽音

其四

階萸凋葉盡宮漏滴聲殘  
玉几俄遺訓龍樓罷問  
安雲容愁慘戚風色慟悲  
酸萬古餘功德煌煌玉  
冊寒

其五

疇昔占重夢今來嘆鳳飛漢宮遺內則文母謝芳  
徽永卧重泉夜空餘大練衣魏郊寧久駐會有德  
陵歸

其六

阿母瑤池去應歸海上峯寶奩空有象練幄靜無  
蹤孝享嚴三廟輿儀備九龍獻陵今密邇揮泪洒  
楸松

其七

聖德高千古慈闈十萬春地維傷絕紀月彩忽韜  
輪應物歸先識憂民感至仁神儀雖已閔遺範不  
埃塵

其八

膺符稱太母衍慶廣金源衣練蠲重彩躬蚕屈至  
尊賜冰防病暘恤獄恐民寃孝意遵遺訓詞臣嘆  
永言

其九

葛覃歌節用卷耳頌求賢遽厭人間世還為物外

仙會觀羞泉露無復夢捫天玉座虛長樂依然夜  
月懸

其十

謙抑傳家法寬仁沃帝聰禮崇光教塔時奉孝嚴  
宮皂隸息皆及嬪妃愛悉同繞階花泣露應是怨  
西風

其十一

慶源鍾馬鄧何止活千人陰化行中壺私權抑外  
親鳳輿歸厚夜蚕館閉長春蕭寺諸嬪御能忘賜

饒頻

其十二

方享東朝奉俄成甲子還玉梳音窅窅彤管事班  
班陵寢音容悶蓬萊日月閑丁憂遺詔在恩澤滿  
人間

其十三

式屬多難際方承長樂歡霜飛金殿冷月沒桂宮  
寒雨泣愁雲慘風悲薤露殘南山為樂石遺美豈  
能刊



其十四

一紀坤儀正千齡  
母範章徽音齊太姒  
厚德配娥皇  
衣練昭純儉  
因山戒厚藏  
傷心彤史上  
千古播遺芳

其十五

緱氏傳仙裔  
燕山啟夢符  
化人先正己  
祈福為民敷  
疾殆申遺命  
憂深示永圖  
傷心虞帝事  
烟雨暗蒼梧

其十六

海州六  
一  
奔走來群辟哀推慟百靈妖氛湮璧月霄漢殞軒  
星玉几遺周訓粧奩泣漢遶近畿導薄葬神意想  
來寧

其十七

身尊恒率禮名正更持謹椒掖坤儀正天遶母訓  
嚴鴻名登玉簡遺像入霜縑異日朝陵處應須啟  
鏡奩

其十八

寬和能待物凝密勸行仁道德持三寶息私逮四

民兩朝隆漢禮十亂冠周臣一旦仙遊去空餘四海春

其十九

心知為善樂敬傅又尊師國化濯衣儉民歌賜藥  
慈誦經虛玉案奉佛冷金彛遺旨無窮恨風吹徧  
九疑

其二十

六綉辭秋殿玄堂啟夜扉一朝歲壽器千載閱容  
衣懸象軒星掩哀歌薤露稀松楸交隧道會有五

雲飛

其二十一

保阿成訓在閭闈令儀昭儉德高千古仁聲溢兩  
朝事隨流水逝愁逐冷雲飄仙馭知何適憑誰問  
沈寥

其二十二

陰化媿乾造熙朝賴母臨功勳新女史德澤決人  
心偃月丰容闕軒星瑞彩沉笳聲哀不盡陵柏自  
森森

其二十三

元勲施社稷茂德庇人民色養嗟中阻靈遊忽上  
賓侍臣歌薤露神物護龍輜祔廟推尊謚千齡寶  
冊新

其二十四

太姒敦周化塗山啟夏家尊名天比峻淑德日增  
華孝享心何切仙遊望愈賒空餘遺今在攀慕極  
幽遐

其二十五

天禍纏興慶幽堂掩后幃徽音知有嗣孝養痛長  
違夜月空楸屋秋風冷玉衣遙瞻陵寢上悵淡暮  
雲飛

其二十六

風急搖寒樹虹蜚薄太陰雲隨仙馭遠塵入綺簾  
深索莫長秋外蕭條湘水潯聖情時悵望流泪滿  
宸襟

其二十七

吉夢捫天浚明裡配地時嬪虞章淋慎生武極息

慈無復金輿返空瞻畫翬馳蕭蕭松柏路長夜闕  
神儀

其二十八

玉音昭懿行彤管列闕休今日歸陵寢何年返玉  
樓聖心方盡孝鸞馭竟難留陵樹西風裏千秋萬  
古愁

其二十九

群生資茂育至德果難名  
憑几言猶在因山事已  
成西風翻畫翬落日送銘旌  
羽衛歸來晚蕭蕭萬



馬鳴

其三十

音容歸壽器管御玉衣閑聖孝空如慕慈顏痛莫  
攀雲愁縈汴水霧慘鎖夷山悵望白楊路翟車竟  
不還

其三十一

孫謀貽嗣聖內教輔先朝孝敬全終始勤勞繼夙  
宵民災憂水沴邊患慮天驕大漸惟幾際猶思儉  
德昭

其三十二

一紀成功著乘鸞上九天物生思德載聖慮想思  
憐儉素言猶在寬慈事有傳禁闈斜日晚空裊寶  
爐烟

其三十三

飄飄成遠駕寂靜掩玄堂蕩蕩神功著巍巍聖業  
彰周任揚溢美漢鄧藹餘芳末命丁寧意憂民不  
暫忘

其三十四

褒讚存公議無慚六后名粧奩空有迹佩玉窀無  
聲登享升清廟哀號動聖情神靈陰有力保佑再  
升平

其三十五

蘋藻親三奠禕禴備六衣坤元方載物軒宿遷淪  
暉廟貌嚴新祔神遊邈不歸白雲無處所長傍德  
陵飛

其三十六

馮相方觀祲巫陽忽告灾千秋臨寶殿一夕闕泉

臺纒緋悲長往靈輶挽不回昊天思罔極長使聖  
情哀

其三十七

仙源周太子華裔漢徵君生聖休祥著憂民儉德  
勤姜姬欣懿範光烈恧鴻勳輔就中興業飄然返  
白雲

其三十八

蜃輅陳彛憲龜人獻吉占郊衢笳鼓咽羽衛甲兵  
嚴雲氣迎鸞馭秋塵翳寶奩祝官揚至德簡冊發

幽潛

其三十九

月殿封鸞鑑風幃卧佩環百神來肅衛萬騎盡虛  
還兩泣銘旌濕風淒總幄閑仙遊無覓處追慕悵  
宸顏

其四十

月暈驚虧薄川流駭沸騰憂勤終爽豫報施似無  
憑長夜扃銀海愁雲慘玉繩聖心哀念切素幄每  
晨興

河上

築堰分泉脉開溝斷荻芽風期占月暈水信讖桃  
花早愛瀕河麥晴憐喚雨鳩春隨挑菜侶月趁捕  
魚舟

雪中登真定閣

風丹下如意寺樓高霞吟城中十萬戶一雪太平  
心

連雪潮退

夕陽明島寺海氣入邊城潮落青魚出泥深白鳥

行

郎山雜詠

天城

造化搏清氣秀出天城山青松伴僧老白雲如我

閑

馬耳峰

房駟落人間入石露雙碧月明聞夜嘶驚落山頭

石

仙人峯



世界幾微塵古今一昏曉笑謝區中緣獨立萬物表

摩雲峰

青山本無情白雲自來往身在浮雲中仰看浮雲上

獨冠峯

大堦難為兄小堦難為弟百里見主峰衆山皆迤邐

五芝峰

白雲如幽人出山本無期朝來抱幽石五峯成六  
芝

鬱秀峯

道人西澗去衣上南山雨心知石堂煙晴峯正堪  
數

泓雲泉

藹藹春雲滋岩溜滴泉乳獨留一泓碧去作人間  
雨

上龍門

南北兩石門上下一靈鷲仰看蓮峰立忽見天門  
透

下龍門

亂峰排鳥道一水會龍門禹力不到處猶如滄海  
尊

奉命奏告山陵

四首

祇命歎園陵倂裝事行役黃葉宿幾程青山館三

日

其二

西山積翠氣空外  
摩青天飛笳不到處  
獨鳥冲寒烟

其三

山前紅樹合  
山頂白雲封  
山中有蘭若  
日暮聞疎鐘

鐘

其四

山月出未高  
林深鳥猶夢  
霜落人未知  
寒添覺聲重

重

遊崆峒四絕

青龍峒

青龍不可見雲自洞中出為雨濟人間歸時杳無跡

仙人橋

絕澗初無路通仙忽有橋偶携青竹杖平步到雲霄

翠屏山

山作屏風樣其如空翠何不遮秋塞盡空障夕陽多

滄水六  
三六  
泰雲亭

鳥語山更靜  
松風聲自寒  
不嫌雲氣濕  
來此凭闌

干

閑閑老人滄水文集卷第六

閑閑老人滄水文集卷第七

律詩

春山詩意圖

何年身入畫圖傳似是三生孟浩然詩句工夫驢  
背上醉鄉田地酒旗邊一川芳草綠堪染夾路杏  
花紅欲然想見歸來泥樣醉却如醮水柳三眠

春日即事

夫願偶到野人家摠把深心付物華鳥毳餘情閑  
日月花心深蠹半塵沙遊絲送上風中柳亂沫分



屯水際楂且共年光暫觀化直須美酒送生涯

酷暑 二首

林鴉開味忘飛騰天地為爐萬象蒸冰井湯塵几  
千尺塔鈴風悶十三層夢魂正遠雲帆客畫本閑  
臨雪麓僧一枕雨窓惟靜勝不須赤脚踏層冰

又

石枕繩床夏簟藤漫膚終日歔歔蒸夢飛楚澤三  
千里人在秦樓十二層松頂露涼時警鶴山房泉  
冷獨輸僧人間膏火盡城市世外清涼勝飲冰

棕扇

犀甲龍鱗倚半空  
抱歸掌握自清風  
山精附木鬚  
髯古回祿煽炎尾  
鬣紅何處青  
蠅千里外向來  
白羽一揮中  
水邊石上應須此  
乞與文園病肺翁

三臺懷古

人道奸雄君似鬼  
奸雄我道鬼  
輸君身猶北面魏  
基建骨入西陵  
漢鼎分貪與  
郊金成舜禹  
不知典  
午笑桓文清漳不洗前朝惡  
日送三臺送夕曛

寄王學士

寄與雪溪王處士年來多病復何如浮雲世態紛  
紛變秋草人情日日踈李白一盃人影月鄭震三  
絕畫詩書情知不得文章力乞與黃華作隱居

登友雲亭

友雲飛觀鬱崔嵬落木蕭蕭聽者哀九日朱絃和  
雁斲開年黃菊費詩催淮天雨露橙千里梁地風  
烟酒一盃此日此生人共醉明年重健與誰來

除夜

二首

梅花無信報平安又聽譙門畫角殘荒郡人烟窮

臘外上方樓閣晚雲端沉沉鳥沒天無盡漠漠烟  
昏山更寒日暮數峰猶帶雪城頭霽色入攔干

又

龍鐘三十九年春諱說新年似諱貧醉白名堂甘  
後進小坡着號似前身自憐耐辱稱居士人笑無  
機似道人斷送生涯一枝足不須長物擾天真

娛暉軒

石晉地形今入眼幾人亭榭幾人詩數州山水有  
窮處萬古風烟無盡時天逐南帆秋雁遠峰遮西

望夕陽遲客來欲問忘歸意掛起僧軒君自知

馬頭山清居院

每逢佳處輒安跽及到清居半日慳曉壁撼鐘雲  
離石夜泉洗鉢月搖山人生能作幾時客林下都  
無一個閑不信試看題壁字明朝多是馬頭還

松聲

飛廉作意怒髯龍萬壑千岩氣象雄獨鶴夢中搖  
夜月七絃微外寄秋風石壇醮罷支笻裡天竺齋  
餘隱几中想見紛紛吹子落山堂一洗耳偏聰

林里湛酒

乍坼香泥甕釀成一鞭先到日邊城  
玻璃色映蓄薇露沆瀣光浮金菊英  
偶脫中州先酒譜賴傳後  
壺以詩名相如病渴烏能賦久矣吾衰畏後生

連雲島望海

壯觀天東第一遊  
曉披絕島寄冥搜  
烟中熊岳隨潮沒  
天際遼江入海流  
地絕四維那辨樹  
風來萬里忽通舟  
我從析木西南境  
回望中原四百州

庚申元日

一從禁苑別花塼四度山城自作年  
愁裡柵盤雙  
泪落坐中歲酒  
凡人先此心不動  
吾何敢老去知  
非理固然白髮無兒何足道  
且收見在門尊前

送張仲山

千山飛雪白皚皚  
袖裏吟鞭送客來  
鬚出冰霜年  
貌改眼藏狐貉語  
音猜風吹陰磴  
魚鱗卷日曝陽  
坡龜兆開北去人  
烟山店遠且煨新  
火煖離杯

和林卿錦波亭韻

使君興寄本翛然  
愛此澄波清且連  
楊柳陰中黃



鳥地芙蓉香底白鷗天涼通簾幌風生座露泚琴  
尊月滿舡相見仙裾乘一葉恍疑太一下雲邊

白雪雜興十首

黑山潢水解弓刀茅屋朝來聽伯勞萬里馬辭邊  
雪苦一聲雁拂朔雲高關山落日家何在詩酒春  
風氣尚豪試上荒城望鄉國重來清鏡鑷霜毛

南園

塹水垣城斷往還青林路轉款幽關百年樹腹通  
人過四月花枝對酒閑逸馬風牛春雨草荒天老



地夕陽山金丸逐勝非吾事  
心在歸鴻滅沒間

翠微軒

千里風烟棟宇間  
地形西去接松關  
尊前奚霫來朝地  
雲外幽營不斷山  
故壘蕪城人物換  
斷霞落日古今閑  
百年興廢人空老  
水自東西鳥自還

鎮國寺

靈鷲飛來霧霧尊  
緣雲細路絡城根  
百年樓殿倚天末  
萬井風烟當寺門  
五月微涼清佛界  
六時豪吹動祇園  
四山放入無多力  
乞與西南構一軒

七金山寺

剝簷篆額蠹蝸涎像教塵埃閱百年殿棟猶題遼  
日月圖經不載禹山川荒碑盤屈蜿蜒古壞壁叅  
覃罔象拳想見當時崇奉日無邊花雨散諸天

野香亭

半空欄檻倚雲根暇日登臨付一罇山上青蓮惟  
見塔水邊綠樹定知村花枝低拂尋春騎杜宇頻  
傷久客魂過盡芳時遊客少一軒風雨送黃昏

靈感寺

徒河岸北白蓮東法鼓驚飛碣石鴻塔上風烟高  
鳥路山頭雲雨化人宮松林碍日蜂房冷石砌頽  
沙蟻穴空欲盡休公揮塵樂鬢絲羞對落花風

蘭若院

傳經蘭若歲時同繡轂珠簾處處逢花院鳥歸深  
殿磬雨樓人散隔城鐘長空淡淡吞平野落日微  
微見遠峯季去年來人自老空餘壞衲掛長松

金河寺

何處人間六月秋金河寺外水西頭坐分游客青

天幕醉倒詩仙白玉舟萬里南風雙老鬢百年心事一沙鷗王侯蝼蟻俱塵土一笑從來萬事休

趙園

佳木千章曲岸南此園閱世似飛禽地幽花晚春兼夏山近嵐昏晴似陰溪雨斷橋愁渡水樵風吹帽怯穿林馬頭納納沙邊路霜葉濃時憶重尋

扈蹕萬寧宮

一聲清蹕九天開白日雷霆引仗來花萼夾城通禁禦曲江兩岸盡樓臺柳陰罅日迎離輦荷氣分

香入酒杯遙想薰風臨水殿五絃聲裏阜民財

琵琶嶺

曉拂朱欄滿袖風支頤冷望翠微中薄雲漏日岩  
開碧淺露離花澗滴紅馬散平坡臨水聚人來盞  
路到山窮子雲老大無才思懶賦長楊五柝宮

拂雲平

萬疊雲山最上頭千官影裏侍宸游翠岩秀色來  
天地黃嶺嵐光上冕旒帳殿影臨眠鹿地簫韶鼓  
入射熊秋翠華指日東巡狩回望中原第一州

金蓮

一望金蓮五色中  
離宮風月滿雲龍  
向來菡萏香銷盡  
何許薔薇露染濃  
秋水明邊羅襪步  
夕陽低處紫金容  
長揚獵罷回天仗  
萬燭煌煌下翠峰

五月牡丹應制

好事天公養露芽  
陽和趁及六龍車  
天香護日迎朱輦  
國色留春待翠華  
穀雨曾霑青帝澤  
薰風又卷赤城霞  
金盞薦瑞休嗟晚  
猶是人間第一花

和王正之寄遠

二首

人生會合少知音一榻高懸肯重尋  
後日相逢應老大何時一笑共登臨  
三年京國塵埃夢千里故人離別心  
想見詩來愁擘紙倚欄清快北風襟

又

鐘鼎功名自有時如公才力不嫌遲  
且尋彭澤籬邊菊莫賦玄都觀裏詩  
晝寢執經童子問春遊齋印吏人隨  
懸知山縣無公事好續琴高第二碑

甲子元日大安早朝

闕角蒼龍建斗杓衣冠萬國大安朝  
使臣未入分



班立殿陛將升按笏招彩殿中間瞻北極丹墀側  
畔聽簫韶太初甲子天元朔萬歲常瞻玉燭調

紅梨花應制

染根日日費天工眼底梅花夢不同春色似憐啼  
夜雨天恩特許醉春風袖障翡翠餘輕碧雪點胭  
脂暈小紅漢主葦宮三十六溶溶和氣月明中

轅門不寐

蕭蕭傳柝月三更歌枕轅門聽鼓聲戰馬不肥淮  
甸草征人愁望歷陽城兵戈荏苒音書絕行李蕭



條蟻虱生早晚樓船下揚子滿天風雨洗蠻荆

寄懷

不問山林與市朝大都鵬鷃各逍遙歸心老去投  
林鳥壯志春來掛壁矜聖處工夫惟易可閑中日  
月以琴消十年鏡裏功名事白髮年來漸不饒

賦雪和張子野巡字韻

翰林風骨玉為神天遣簷花送酒巡侍從驂騑應  
白鳳神仙宮府不紅塵懸知穎尾風流奮不及鰲  
頭句法新天上玉堂誰得見風光袞袞筆頭春

楊祕監畫高士過關圖

三生自是竹林遊  
寫出荒寒意外愁  
世事盡如翻着襪  
人生剛笑倒騎牛  
閑山風月詩千首  
富貴豪華土一丘  
獨有文章磨不得  
至今圖畫想風流

重陽後雪寄馬柔克

朝來飛雪白糝糊  
城郭山川入畫圖  
一色乾坤還太素  
萬家樓閣化清都  
狐裘貂帽將軍騎  
金帳羊羔太尉妹  
何似吾家正清絕  
曉窓吟撚凍鬚鬚

過代州

金波曾醉雁門州  
端有人間六月秋  
萬古河山雄朔部  
四時風月入南樓  
漢家戰伐雲千里  
唐季英雄土一丘  
繫馬曲欄搔首望  
晚來閑殺釣魚舟

靜陽道中

路轉山腰步步迷  
高林淺水下回溪  
蒿花釀蜜蜂貧腹  
柏葉儲香麝養臍  
不覺困來尋短步  
偶逢佳處入新題  
何時更到園林寺  
看遍峯巒處處低

題郝運使榮歸堂

翰墨聲名四十年  
歸來還作地行仙  
柴桑問路陶

元亮洛社休官白樂天拄杖扶兒還客拜畫圖繪  
老聽人傳窮秋雨恹陂田出想見騎驢興渺然

遊却家樂

二首

山嶺人家半夕陽倚墻爭看騎紅粧野泉自入它  
州界古碣猶存舊姓鄉蛇出廟壩神古柳牛尋沙  
漈憇柔柔蟬聲抵死催歸騎辜負亭陰一枕涼

又

水際林間杖屨香綸巾野服道家粧婦姑緝繭欣  
同社翁仲扶筇不出鄉拜跪使君嗟老大逢迎地

主問耕桑令秋一飽天難必且快新苗雨後涼

題近侍局使聚扇

早朝攜入紫薇宮日月都歸掌握中運動樞機真  
有道卷藏懷袖不言功宸筵永日更番暇水殿微  
涼侍宴終願以微軀奉清燕仁聲宣播舜弦風

張清獻公慶八十壽

富貴康寧壽八旬明時乞得自由身宦途班列聯  
三事家法中朝第一人疎傳未歸東海郡白公獨  
享洛城春籬金換得傳經業留與玄成贊化鈞

上方

山近西臺易夕烟東臺占得夕陽偏貪看歸鳥過  
林隙不覺竒峰墮眼前土灶夜燒松葉火石盆曉  
漱菊花泉丹梯橫絕青山路勸子先叅鳥道玄

題右丞畫荷蓀圖

杏花菖葉雨聲春甘作明時荷蓀身只道烏鴉猶  
父子豈知螻蟻亦君臣杖頭明月拋周器松下衣  
冠自舜民好在丹青王右轄解廻枯槁入陶鈞

遊上清宮

二首

霜葉蕭蕭覆井欄朝元閣上玉筍寒千年遼鶴歸  
華表萬里宮車泣露盤日上霧塵迷碧瓦夜深月  
露洗荒壇斷碑膾炙人何在吏部而今不姓韓

又

暇日登臨近吹臺夷門城下訪寒梅鰲頭它日幾  
人在樽酒而今一笑開秋潦滲餘村迳出夕春鳴  
處野禽來醉歸扶路人爭看知是詩仙閬苑回

送月上人赴少林

隻臂伽黎不作難將心到處遣人安瓶離汴水秋



風冷錫入嵩峯夜月寒篋裏贈詩更雨曠囊中施  
鉢對風餐心知擬就東林宿已向林稍薦刹竿

登定安閣

翬飛高閣迥凌虛中有盤盤一塔孤千里河山隨  
指顧諸天日月遠彌盧神起罔象遺身世眼見蒼  
茫一有無便欲乘風遊汗漫幡然回首念南都

許州襄城縣進嘉禾合穎應制

襄城城下壤歌傳駟奏嘉禾到日邊穎合周王新  
雨露畝分黃帝舊山川太平氣象聯珠琲明德馨



香列豆籩萬國和同歸帝治古書願獻補遺編

陳州進黃鸝鵠應制

隴鳥明時亦效祥天教合侍赭袍黃九重城裏駢  
鶯舌百子池邊借鵲裳夜臂翠簾條脫市春籠珠  
殿荔枝香紫宸朝退鳴鞘遠偷學山稱萬歲觴

寄陳正升

渺渺西風去翼輕霜林楓葉動秋聲嵩卽競秀容  
多可河洛爭派忌獨清廣武山川留故壘成臯草  
木闕空城憑高一掬英雄泪付與窮途阮步兵

贈磨鏡李先生

自笑年來白髮公  
丹砂不肯借顏紅  
分無海上三山藥  
來訪人間百歲翁  
黃瀆何曾浣明月  
青天元不碍冥鴻  
何時相約丹元子  
便欲因之乘曉風

記夢

六年京國鬢塵黃  
一望家山一斷腸  
病後始知謀退晚  
夢中猶記和詩忙  
風來竹裏娟娟好  
水過花間冉冉香

夢句

學道無成還自笑  
人生習氣果難

忘

登天壽閣

人間赤日無處避  
天上雲居即寶坊  
鳥飛無礙長空濶  
人意自生高閣涼  
風來為作不請友  
午夢經到無何鄉  
黃昏索馬出門去  
猶望東華塵土黃

和劉雲卿

屏山歿後使人悲  
此外交親我與雷  
千里老懷何日寫  
一生笑口幾回開  
心知契濶留陳土  
將復登臨上吹臺  
目極天低雁回處  
西風忽送好詩來

和種竹

君家種竹五七箇我亦近栽三數竿  
兩地平分風月破大家留待雪霜看  
土膏生澁葉猶卷客枕夢回聲已寒  
見此又思君子面何時相對倚欄杆

寄元裕之

久雨新晴散痺頑一軒涼思坐中間  
樹頭風寫無窮水天末雲移不定山  
宦味漸思生處樂人生難得老來閑  
點芝眉宇何時見誰與嵩山共往還

送宋飛卿

二首

雄豪兩妙秀而文不獨吾云人亦云  
賀監早知仙

李白薛宣那得吏朱雲秋風汾水傷今別明月郊  
與子分瘦李之純髯雷希顏隔存沒只愁詩壘  
不能軍

又

未能免俗聊從宦還望孤雲憶舊廬不樂輕歸真  
吏隱得閑隨分寄僧居閑山牢落三年夢行李蕭  
條一束書想見蓮花峯下過路人遙指倒騎驢

至日次劉雲卿韻

此生天地一陳人百歲三分過二分老去光陰空

惜日愁來世事獨看雲靜中  
剝復觀消長身外榮  
枯聽糾紛猶有憂時心未已  
卧聽兒誦戰場文

百五日獨遊西園

西園啟鑰起芳塵滿眼風光不屬春  
樓閣人非空似舊溪山歲久却成真  
斷橋沒板橫斜艇古木歌垣碍去輪  
老去搜詩厭彫斲晚風吹水白鱗鱗

題王摩詰畫明皇劍閣圖

劍閣森危隔錦官雲間棧路細盤盤  
天迴日馭長安遠雨滴鈴聲蜀道難  
當日大軍同駐馬他時萬

里獨回鑿傷心凝碧池頭句有底工夫作畫看

和欽止河中即事

鶴鵲樓前一望時長河寂寞送斜暉人歌人哭幾  
興廢年去年來今是非寒雨渡頭人斷渡秋風汾  
水鴈來稀千村萬落人烟霽更許砧聲暮擣衣

弔袁用之

卜築中條四十秋安排佳處近休休隱居境為王  
官勝仙伯名因少室留架上殘書灰燼冷囊中妙  
藥鬼神偷傷心天柱峰頭月曾照先生杖履遊



古瓶蠟梅

石冷銅腥苦未清  
瓦壺溫水照輕明  
土花碧暈龍紋澁  
燭泪痕踈雁字橫  
未許功名歸鼎鼐  
且容風月入瓶罍  
嬌黃喚醒昭陽夢  
漢苑淒涼草棘生

雪意

門巷蕭條日易曛  
豆楷灰欲落江雲  
眼花淡淡初疑見  
耳重蕭蕭竟不聞  
便可一盃平體粟  
不須六出點衣紋  
慙慙急遣蓬萊使  
探到梅花破幾分

粟



漁陽上谷晚風寒  
秋入霜林粟玉乾  
未折棧欄封萬穀  
乍分混沌出雙丸  
賓朋宴罷煨秋熟  
兒女燈前爆夜闌  
干樹戾封等塵土  
且隨園芋勸加餐

憶橙

悵望天涯驛騎塵  
政須玉甲破芳新  
可憐虛度梅梢月  
無計相陪竹葉春  
三日手香頻入夢  
一年秋好不關身  
快須準備新詩句  
倘有金苞贈故人

射虎

眼花百步透林寒  
抵死嗔人守九關  
只道草中藏

白額豈知世上有黃間才聞父老愁三害  
修見熊羆寢一斑寄謝咸陽嘆黃犬何如霧豹隱南山

冬至

天時人事不難量消盡群陰又一陽  
千里家山憑夢到數莖白髮為愁長  
老來度日惟經卷病後關心祇藥方  
六十之年今過五不須苦死問行藏

菊  
二首

水冷雲疎木葉黃遠籬目送雁南翔  
酒傾桑落林廬靜秋入騷人齒頰香  
人惜後期霑雨露天教晚

節傲風霜憑誰寄語陶元亮不為南山興自長

又

西風吹葉靜千林獨有幽香伴苦吟細蕊宮槐舒  
碧皺小花佛頂暈黃深誰憐細雨情何限可惜清  
霜瘦不禁寄語兒曹莫輕折重陽留待付孤斟

九月十一日夜對月

無花無酒過重陽轉覺閑居興味長明月豈隨人  
薄厚黃花不逐世炎涼閏年節晚初過夜老境衾  
寒知有霜清境喚迴蝴蝶夢起尋竹影據胡牀

荅趙慶之節使

故人別後定何如  
春雁來時忽寄書  
壯歲從軍幾  
人在老來分手五年餘  
掛冠無計追和景  
襍被何時付魏舒  
遙想西州賢父老  
瓜疇閑伴故侯鉏

題劉萊州像

當年二老趙張儔

王儵然知府焦明鏡運使

獨許

先生第一流  
異政曾聞山鬼伏  
直聲湏向古人求  
從來走卒知司馬  
到處兒童說細侯  
惆悵當年舊  
遊處羊曇不肯過西州

九日會極目亭

孤亭高壘冷雲堆  
九日登臨貰酒盃  
魏國河山殘照在  
梁王臺殿野花開  
鷗從白水明邊沒  
雁向青天盡處回  
未必龍山如此會  
座中三館盡英才

再和

秋興高於灑瀨堆  
秋光併入阮公盃  
霜凋蒲劍三稜折  
雨裂荷衣十字開  
北雁遠浮梁水動  
南雲低抱楚天回  
前季此日登高會  
點檢唯無短李才

謂

屏山死矣

過楊太尉墳

道傍古塚入荒榛  
下馬摩娑漢八分  
誰謂皇天無老眼  
却令大鳥泣孤墳  
獨携一盞霜風酒  
一酹三峯日暮雲  
李杜就誅鉤黨起  
可能天下獨傷君

過邠州 二首

地靈物秀古稱雄  
前有汾陽後范公  
千古山川形勝地  
兩朝人物畫圖中  
一家忠厚餘風化  
七月桑詠女功誰識  
聖賢遺意在黍離  
篇末離豳風

又

遙看汪水遶城流下盡坡陀始見州歲暮簡書催  
出塞天寒風雪送行輶坡田井井龜圖書山路盤  
盤篆印繆更欲慇懃訪陳迹夜深燈火伴牢愁

過慶陽

地形占得古金湯感嘆當時幾戰場父子一家三  
范帥功名異代兩汾陽四山帶郭環天險二水分  
派會女牆想見公堂無一事臨川閣上日飛觴

暮春得寒字

九日聊偷一日閑三分春色二分闌鄉閨夢裏人



空老風雨夜來花更殘乍坼甕泥糕酒熟未開火  
禁粥錫寒何時投劾歸田去楊柳陰中把釣竿

秋雨

十日秋霖不出門門前流水似江村墻頭新竹大  
于母砌下老桐今有孫澤雁背飛驚吹急濠魚逆  
上避河渾秋風未得乘槎便擬控扶搖北海鷗

百塔

松林橫截東南野蘭若斜連子午庄平楚風煙開  
鄠社斷碑歲月自隋唐樓頭山入詩人座砌下泉

分衲子房更欲秦川窮勝槩却從高塔望雲陽

過石氏園 樂天故居

石氏園亭竹一圍眼前勝事只心知幽禽有語能  
留客流水無情自入池客裡歲華將盡日梅邊春  
信獨來時醉吟吟後無吟者又得閑閑一首詩

上巳遊西園分韻得蘭字與楊禮部携同院

諸公賦 二首

相逢草草即盃盤誰識吾曹箇裡歡燕蹴簷花墮  
茵席魚搖波日動欄干無窮照影溪溪柳不住吹

香碗碗蘭已屬清明連上巳更容飛蓋接鴛鸞

又

跨鳳騎麟玉笋班寒驢不作杜陵酸已煩蠟紙書  
陳迹更許仙舟泛碧瀾酒令致師嚴細柳詩用塵  
戟劇皋蘭遨頭却返瀛洲去夢覺揚州鶴背寬

挽劉雲卿

人物于今嘆渺然知君才德幾人全忠言唐介初  
還闕道學東萊不假年黃壤苦埋經去志清瑣未  
了讀書緣西園酬唱空陳迹泪洒南風擘素牋

楊尚書宮直雪作擬應制作詩某時在暇聞

而和之二首

霰雪霏霏點玉英  
玉堂鈴索峭寒生  
也應天上多端葉  
無賴人間有化城  
兔苑因之賢者樂  
羊羔加以聖之清  
吾曹安預籌邊事  
且及新年賀太平

又

黃昏陡覺悄寒生  
漏溢銅壺第几更  
未放六花齊苑樹  
先留半月抹宮城  
一陶風俗還純素  
盡領乾坤入太清  
應是上方觀下界  
故教雙眼一時明

二月見梅花

不應開處避嚴冬無賴春寒雪尚封  
縱使風霜欺爾瘦可能桃李為君容  
麗眉都尉嗟何晚飛騎將軍不逢  
畢竟榮枯無定在此花勸汝倒金鍾

春寒花較遲

吟懷常恨負芳時及至春來雪尚滋  
榆莢半含糝粒色柳條未變翹塵絲  
墻陰更覺花開晚水冷應知雁到遲  
慚愧蓬萊老仙伯已迴和氣入新詩

殘梅

寒梅不作白頭新相對依依似故人  
要伴賓鴻并社燕未隨涿水與紅塵  
空枝擬折猶堪嗅殘蕊重  
香不歇頻自是東皇催鼎食無情風  
而不關春

杏花

香傳微雨隔簾攏十載觥船不負公  
愁見餘春紛雪白且看初日眩霞紅  
兩株副使鶯吟裡一色新郎馬足中  
投老安能知許事一鞭農事趁春風

此近體字樣詩

非詩也悚愧

慶學士拊獻七十壽 二首

乞得閑身七十餘，知幾初不為鱸魚胸中幸。有平  
邊策林下聊觀養性書，收拾雲山歸蠟屐。奉藏事  
業入籃輿，君王拊髀思頗牧。未許先生作隱居。

又

小築龍潭德不孤，盧鴻新有草堂圖。四朝人物今  
誰在，二老風流與我俱。把酒笑談猶解醉，上山筋  
力不須扶。文章不逐年齡改，能為開興作頌無。

訪天寧周老



滄水  
五  
獎崇羸童負束書清晨緲緲獨騎驢乍辭天上尚  
書履來訪雲間大士居覽鏡年年非復我照溪  
霞得逢渠從今莫訴經過數乞得閑身頗自如

閑閑老人滄水文集卷第七